

16 Mars 11 1^{re} May 1651

2208

LETTRE ESCRITE
A
MONSEIGNEVR
L'ARCHEVESQVE
D'AMBRVN;

PAR VN CLERC DE
son Diocese, sur l'opposition
formée au Seau par l'Assemblée
du Clergé de France tenuë à Pa-
ris, & signée de luy, à la Declara-
tion du Roy, poursuivie & de-
puis obtenuë & verifiée par le
Parlement de Paris, pour exclu-
re les Cardinaux, mesmes Fran-
çois, de l'entrée des Conseils du
Roy.

A AMBRVN,
M. DC. LI.

LETTRE ESCRITE
A
MONSIEUR
L'ARCHEVEQUE
D'AMBRAS

PAR UN CLERC DE

son Diocèse, sur l'opposition
formée au sein par l'Assemblée
du Clergé de France tenue à Pa-
ris, & l'usage de la D. clau-
sion du Roy, pour l'avis & de
puis corrompue & vengée par le
Parlement de Paris, pour exclu-
re les Cardinaux, moines Fran-
çois, de l'entrée des Conseils du
Roy.

M. DE L.
M. DE L.

*****s*****

LETTRE ESCRITE A

*Monseigneur l'Archevesque d'Ambrun
par vn Clerc de son Diocese, sur l'oppo-
sition formée au Seau par l'Assemblée du
Clergé de France tenue à Paris, & signée
de luy, à la Declaration du Roy, poursui-
vie, & depuis obtenue & verifiée par le
Parlement de Paris, pour exclure les Car-
dinaux, mesmes Francois, de l'entrèe des
Conseils du Roy.*



ONSEIGNEVR,

Le Clergé de vostre Diocese, & mesme de toute la Prouince auoit conceu de grâdes esperances du choix que la Reyne auoit fait de vostre personne, pour remplir la dignité d'Archeuesque d'Ambrun. Il rencontroit en cette eslection vne liaison de la naissance avec la doctrine, non seulement à cause qu'il voyoit vn Gentil-homme d'vne des meilleures maisons du Royaume eleué à vne des premieres & plus importantes charges de l'Eglise, mais encore principalement pour la doctrine, qui doit estre presumée en vn Docteur de la Faculté de Theologie de l'Vniuersité de Paris; En effet on auoit sujet de croire que le Cardinal Mazarin vostre bien faicteur par vostre promotion à l'Archiepiscopat, auoit voulu faire cesser en vostre personne la plainte du bon Docteur Duarein, quand il a dit avec non moins d'indignation que de verité, detestant l'aneantissement &

Quod agrè admodum fert hominū vniuersa Ecclesiasticorū hominū natio, querunturque vulgo ex aulicorum face prophanos abjectissimosque homines sibi antistites dari solere.

Duarenus de sacris Ecclesie ministeriis ac beneficiis lib. 1. cap. 6

l'abrogation de la Pragmatique Sanction par la reception du Concordat, que toute l'Eglise se plaignoit deslors de voir les Euesques esleus de la lie des Courtisans, si ce n'est que vos ennemis voulussent vous mettre en ce rang par les submissions indignes d'un homme d'honneur, que vous auez renduës à Mazarin & par les attachemens secrets & publics, que vous auez au Mazarinisme, duquel on vous donne la reputation d'estre grandement infecté. Vostre Clergé, qui vous connoist mieux de nom que de veüe, espéroit qu'apres l'eypulsion de cet infame Ministre hors du Royaume, & les comptes du Clergé rendus, la Cour & l'Assemblée du Clergé ne vous seruiroient plus de pretexte pour vous dispenser de la residence, & que vous pourriez luy faire la grace de l'honorer de vostre presence, afin de l'instruire par vos doctes predications, & corriger ses defaux par vos bons exemples. Il est vray que l'on nous a dit que si vous ne preschez pas mal, vous ne preschez pas aussi souuent, & qu'encore faut-il que ce soit devant le Roy, ou la Reyne, ou devant Messieurs les Princes, afin d'en auoir la recompense des ce monde, sans vous reseruer à la recevoir en l'autre, & que vous esperez par ce moyen obtenir de leurs Majestez quelque Abbaye pour vous dedommager de celle que le Cardinal Mazarin vostre bon amy vous a escroquée par son commerce ordinaire, en vous faisant *Monseigneur l'Illustrissime*. Neantmoins tous ces attachemens de Cour ne nous ostioient point l'esperance de vous voir, & de vous entendre quelque jour dans vostre chaire Archiepiscopale, instruire & consoler vostre troupeau, & que Dieu enfin briseroit vos chaines pour vous donner la liberté de venir jusques à nous. Mais les dernieres nouvelles de Paris nous ont bien détrompez, & apres auoir veu l'opposition formée par le Clergé à la Declaration que le Parlement demandoit pour exclure des Conseils du Roy tous Cardinaux mesmes François, signée *Georges Daubusson Archeuesque d'Ambrun*, nos esprits ne sont plus en balance

lâce sur le point de vostre residence, & sont tres persua-
 dez que vostre intêtiõ est & a tousjours esté de ne point
 resider, & que vous tenez vostre Archeuesché cõme vn
 Benefice à simple tonsure. Il est honteux, Monseigneur,
 qu'un acte de cette qualité ait esté resolu dans vne As-
 semblée d'Ecclesiastiques, qui se disent représenter le
 Clergé general & l'Estat Ecclesiastique du Royaume,
 & que des Archeuesques, Euesques & autres Ecclesias-
 tiques Deputez pour entendre vn compte, & pour
 fournir aux necessitez de l'Estat vne somme d'argent,
 ayent osé engager tout le Clergé de France dans vne
 resolution contraire à la parole de Dieu, & l'on peut
 dire en ce rencontre que ce n'est point vne Assemblée
 du Clergé, que le S. Esprit n'y a point presidé, que c'est
 plustost vne Chambre des Comptes de Castille, com-
 me l'appelle Monsieur Leschassier, qui mange plus
 d'espices en la reddition d'un seul compte que la
 Chambre des Comptes du Roy n'en consomme en
 toute vne année pour la reddition des comptes de
 tous les reuenus du Royaume. Et il ne seroit pas diffi-
 cile de faire voir ailleurs que dans vne lettre que ceux
 qui ont resolu & signé cet acte ne croient point en la
 parole de Dieu, & qu'elle passe dans leurs esprits pour
 vne fable, & pour vn conte fait à plaisir, si ce n'estoit
 que nous sommes informez avec certitude que les plus
 sçauans & les plus pieux d'entre les Deputez n'en ont
 point esté d'avis & y ont resisté de tout leur pouuoir.
 Lorsque l'on accusa Iesus-Christ, & qu'on tascha de le
 rendre criminel de leze Maiesté, en luy imposant qu'il
 auoit voulu se qualifier & se faire Roy sur la terre, il ne
 denia pas qu'il fust Roy, mais il fit responce que son *Ioann. 18. cap.*
 Royaume n'estoit pas de ce monde, pour enseigner à
 ses successeurs qui sont les Euesques, que la domina-
 tion qu'il leur a donnée sur les ames des Chrestiens est
 extremement precieuse & entierement spirituelle, &
 qu'ils ne doiuent pas la souiller, par le meslange des
 choses basses & terrestres, & la direction des choses
 mondaines & temporelles.

Nemo militās
Deo implicat se
negotiis seculari-
bus. Epist. ad Ti-
moth. 2. cap. 2.

Cæcilius Cy-
prianus Epist. 66.

Quādo singuli
diuino Sacerdo-
tio honorati & in
clerico ministe-
rio cōstituti non
nisi altari & sacri-
ficiis deseruire &
precib⁹ atq; ora-
tionibus vacare
debeant &c.

Idem eod.

Cuius ordina-
tionis & Religio-
nis formā Leui-
tæ prius in lege
tenuerūt, vt cum
terrâ diuiderent,
& possessiones
partirentur vn-
decim tribus, le-
uitica tribus, quæ
templo, altari, &
ministeriis vaca-
bat, nihil de illa
diuisionis portio-
ne perciperet, sed
alijs terram colē-
tibus, illa tantum
Deum coleret; &

ad victū atq; alimentū ab vndecim tribubus de fructibus qui nascebātur, decimas per-
ciperet: Quod totum fiebat de authoritate & dispositione diuina, vt qui operationib⁹
diuinis insitebant in nulla re auocarentur, nec cogitare aut agere secularia cogeren-
tur. &c. Idem eod. Et ideo victor cum contra formā nuper in Concilio a Sacerdotib⁹
datam ausus sit tutorem constituere, non est quod pro dormitione eius apud vos fiat
oblatio, aut deprecatio aliqua nomīne eius in Ecclesia frequentetur: neque enim apud
altare Dei meretur nominari in Sacerdotum prece qui ab altari Sacerdotes & mini-
stros voluit auocare, &c.

Ce que le S. Esprit a confirmé par la bouche de Saint
Paul en deffendant expressement à celuy qui est en-
rollé dans la milice de Dieu, de s'immiscer & de s'in-
triguer en l'administration des affaires du monde, par-
ce que ceux qui sont honorez du Sacerdoce & consti-
tuez dans le ministere de l'Eglise ne doiuent seruir qu'à
l'Autel, & ne vaquer qu'aux prieres. C'est la raison
pour laquelle les Leuites dans l'ancienne Loy n'eu-
rent point de part à la distribution qui fut faite des
terres & possessions entre les Tribus d'Israël, mais seu-
lement leur fut assigné pour leur subsistance vn droit
de dixme sur les fructs qui croissoient sur les heritages
des autres vnze Tribus, afin qu'ils ne fussent point
destournez par le labourage de la terre de l'application
qu'ils deuoient route entiere aux ouurages du Sei-
gneur. S. Cyprien en l'vne de ses Epitres condamne
fort rudement ceux d'entre les Ecclesiastiques, qui
s'appliquent au maniment & à la direction des affaires
temporelles, iusques là mesme qu'il ne veut pas qu'un
Prestre, qui auoit esté nommé tuteur dans vn testa-
ment, s'ingere en l'administration de la tutelle, quoy
que l'assistance que l'on doit à la veufue & à l'orphe-
lin, soit le cas auquel la charité de l'Eglise relasche la ri-
gueur de la Loy: & d'autant que le testateur auoit don-
né lieu à vn Prestre de se detacher de l'Autel en le nom-
mant tuteur, & qu'il auoit par ce moyen contreuenue à
la discipline de l'Eglise, ce Saint Euesque deffend
precisement que l'on fasse aucune oblation & priere
pour le repos de son ame, n'estant pas raisonnable, dit-
il, de prier Dieu à l'Autel pour celuy qui a voulu tirer
le Prestre de l'Autel. Si vous auiez, Monseigneur, per-

fectionné vostre Scholastique par la lecture de l'Histoire & des Constitutions de l'ancienne Eglise, ie ne serois pas aujourd'huy contraint de vous apprendre cette belle & sainte Maxime reperée à toutes occasions dans vn grand nombre de Conciles Generaux & particuliers, & qui n'est ignorée que des Nouices, comme vous, en la science du vray droit Canonique, & la connoissance des mœurs des premiers Chrestiens, & des Ordonnances de la Primitiue Eglise; Que nul Ecclesiastique ne doit s'immiscer dans le maniment des affaires seculieres. Pour moy qui ne suis pas grand Clerc, ie me contenteray de vous en coter vne disposition tirée d'vn des Conciles de nos Gaules, qui ordonne: *Que tout Ministre de l'Autel du Seigneur s'abstiendra entierement de la negociation des affaires du siecle.* Les sentimens de vostre Assemblée ou plustost de la Chambre des Comptes du Clergé, sont bien esloignez de ceux de vos predecesseurs, & ie m'estonne qu'une Compagnie Ecclesiastique ait eu si peu de conscience & de pudeur, de mettre en deliberation vn aduis de former vne opposition à vne Declaration si conforme aux saints Decrets, & qui va à maintenir dans l'Eglise l'observation de la parole de Dieu, pour laquelle garder tout Ecclesiastique est obligé de souffrir le martyre, ou pour le moins de se retirer dans les deserts plustost que d'entrer dans les Conseils des Princes, si on les y vouloit appeller. Ce n'est pas d'aujourdhuy que le Parlement de Paris, qui a tousiours travaillé auant qu'il a pû à la manutention de l'ancienne discipline de l'Eglise, a renouvelé de temps en temps des Reglemens sur la residence des Euesques. En l'année 1560. le Roy Charles IX. ayant envoyé vne Declaration à ce Parlement, pour obliger tous les Archeuesques & Euesques de ce Royaume de resider en leurs Benefices sur peine de saisie de leur temporel, quelques Prelats, qui n'auoient pas de meilleurs sentimens que vous, Monseigneur, touchant la residence, firent glisser dans cette Declaration vne exception pour

Ne Clericus rebus secularib. se immisceat.

Ministri autem altaris Domini nobis placuit vt a negotiis secularib. omnino abstineant. cap. 14. Concil. Moguntiac. Et cap. 3. Con. Rhemef. i. tempore Leon, 3. Pap. & Carol. mag. Imp. celebr. ann. salutis 813.

ceux de leur Corps qui estoient du Conseil Priué du Roy, afin sous ce pretexte de se dispenser de la residence, non pas pour mettre leur conscience en repos (c'est ce qui ne tourmente pas quelques-uns de cet Ordre) mais pour euer la perte de leur reuenu temporel, pour la conseruation duquel ils mettroient facilement leur vie & souffriroient librement le martyre. Le Parlement procedant à la verification de cette Declaration, reconnut bien que si elle passoit avec cette exception, ce seroit vn titre aux Euesques pour eluder sous couleur d'une qualité imaginaire de Conseiller d'Estat toutes les loix de la residence, & que si cela auoit lieu d'oresnauant toutes les Eglises seroient abandonnées de leurs Pasteurs, & seroient en perpetuelle viduité: Pour à quoy obuier & laisser vne marque à la posterité de son zele à la conseruation des bonnes & saintes Loix de l'Eglise, & les remettre en vigueur, il fut dit que sur le reply des Lettres il seroit mis, qu'elles auoient esté leuës, publiées & registrées sans aucune exception; c'est à sçauoir, porte le Registre de la Cour en ces propres termes: (Que l'Edit contenu

„ esdites Lettres cōme saint & iuste, conforme à la vo-
 „ lōté & cōmādemēte de Dieu, cōstitutions Cōciliaires
 „ de l'Eglise, des Loix & Ordōnances des Empereurs &
 „ Roys Catholiques, sera entierement gardé & obser-
 „ ué sans aucune exception ny limitation, soit pour le
 „ regard des Archeuesques & Euesques estans à l'en-
 „ tour de la personne du Roy & de son Conseil Priué,
 „ que de ceux que le Roy ou ses successeurs Roys pour-
 „ roient appeller en leur Conseil Priué, quelques dis-
 „ penſes qu'au contraire l'on vouldust donner ou obte-
 „ nir, parce qu'estant la residence desdits Archeues-
 „ ques & Euesques fondée en la volonté & ordon-
 „ nance de Dieu, comme elle est, signamment en la
 „ dilection de Dieu qui regarde le ſoin, la superin-
 „ tendance & vigilance desdits Archeuesques &
 „ Euesques sur ceux qui leurs sont commis, & ont
 „ esté baillez en garde, étant le premier & final
 „ commadement

Lecta, publi-
 cata & registrata
 audito Procura-
 tore generali Re-
 gis sine vlla ex-
 ceptione.

„ commandement de la premiere table, ce qui se-
 „ roit fait au contraire ne pourroit tomber en aucu-
 „ ne dispense: & si cas estoit qu'au contraire on ob-
 „ tint aucune dispense par importunité ou autrement, la
 „ Cour n'y pourroit ny deuroit obtemperer, comme
 „ chose contraire à l'ordonnance de Dieu, & partant in-
 „ dispensable, non plus que s'il y auoit Lettres de dis-
 „ pense de n'aymer Dieu, ny d'obeyr à ses Com-
 „ mandemens: & fut arresté dès lors que les Ar-
 „ cheuesques & Euesques ne pourroient prendre titre
 „ ou qualité de Conseiller du Conseil Privé du Roy.
 Si ce reglement eust esté religieusement obserué de-
 puis ce temps-là, le Parlement ne seroit pas en peine de
 recourir au Roy pour le faire renoueller, mais les de-
 sordres ont esté si grands, & l'abandonnement des Dio-
 ceses si frequent & si prejudiciable à l'Eglise, que l'he-
 resie en a tiré des auantages tres-signalez pour faire
 progres. Cet esprit de non residence a donné lieu à
 deux Cardinaux de s'emparer depuis 30 ans de la do-
 mination de cet Estat, qui l'ont réduit à tel point qu'il
 est maintenant aux abois, & que si Monseigneur le Duc
 d'Orleans n'y eust mis la main par le bannissement du
 dernier vostre intime amy, la France alloit tomber dans
 vne confusion & dans vn trouble, qui se fust avec le
 temps rendu irreparable & sans remede. Ce qui est es-
 crit des Euesques pour la residence se peut dire des
 Cardinaux. Ils sont Prestres, Diacres, ou Soudiacres de
 l'Eglise de Rome, & partant ils y doiuent leur residence.
 Il n'y auoit originairement dans l'Eglise aucun Ordre
 qui n'eust son employ & son ministere, ny aucune fon-
 ction qui n'eust son Ordre, & passant d'un Ordre à l'au-
 tre on prenoit le Benefice & le ministere qui estoit attra-
 ché à cet Ordre. Il n'estoit pas permis de passer d'un ti-
 tre à l'autre, mais il falloit demeurer à celuy auquel on
 auoit esté ordonné, iusques à ce que montant à un autre
 Ordre on montoit aussi à vne autre fonction, & à vne
 dignité proportionnée à l'Ordre que l'on prenoit, où on
 demouroit attaché sans vaquer à d'autre employ. L'on

est cap. 14. Cœcil.
Turonens. 3. &
cap. 20. Con.
Rhemens. 1. sub
Leone 3. Pap. &
Imper. Carol.
magn. ann, Do-
mini. 813.

me dira que depuis la separation de l'Ordre d'auec le titre ou le Benefice, que la corruption des temps a malheureusement introduit, toutes ces belles dispositions Conciliaires sont allées à neant : mais à cela ie respons, que si à l'esgard des Prestres & autres Ordres inferieurs, la negligence des Ministres de l'Eglise a authorisé le relaschement de la Loy ; il n'en est pas de mesme des Euesques qui doiuent auoir vn titre certain & assure, & auquel il y ait fonction, & l'on ne consacre point d'Euesque sans luy donner vn titre, auquel il doit demeurer attaché, & ne luy est pas permis de le quitter sans le consentement de l'Eglise. Les Cardinaux pretendent estre encores en vn degré plus esleué que l'Episcopat : leur Eminence se persuade qu'elle s'enferme en foy tous les degrez & tous les Ordres ensemble de l'Eglise. Et de fait dans cette maxime ils sont capables de tous Benefices seculiers & reguliers, & les possèdent selon leurs qualitez, sans qu'ils ayent besoin de se seruir de ces nouvelles inuentions de la Chancellerie de Cour de Rome, inconnuës à l'antiquité & à la pureté de l'Eglise, ny de se faire dispenser pour tenir des Benefices en commendé ou en titre selon les occurrences des cas, au grand detrimēt de la bourse des impetrans, & ont les Cardinaux (comme ils disent eux mesmes) la bouche ouuerte à tout : ils exercent dans les Eglises de leurs titres tous les droicts Episcopaux, & par consequent ils y doiuent la residence, puisque c'est le principal deuoir d'un Euesque.

Habent os aper-
tum ad omnia.
Omnia iura ha-
bent Episcopa-
lia.

Ce qu'estant, il n'est pas raisonnable de les attirer dās les Conseils des Princes temporels, où ils ne produisent que des malignes influēces, comme des astres qui agissent hors de l'estenduë de leur sphere. Adjoustez à cela

Cardinales ad id
delecti, ad Pon-
tificis nutum
pronuntiare so-
liti & alioqui
amplificandæ
Pontificis potes-

qu'ils se disent creatures du Pape, auquel ils ont vn serment tout particulier, qui deroge à tous droicts diuins & humains, & mesme à celui de la naissance ; que le Pape bien qu'il soit le Pere commun de tous les Fideles, il est outre cela Prince temporel & souverain dans le païs de son obeissance, & qu'il peut auoir des desmelez avec les

autres Souverains les voisins , & qu'ainsi c'est vne sage politique & qui n'est pas de petite consideration à vn Roy , d'exclure de ses Conseils tous Ecclesiastiques, comme il est estroitement obserué en la République de Venise , mais particulièrement les Cardinaux, comme gens qui ont serment à vn Prince estrange, qui les rend eux mesmes estrangers dans les lieux de leur naissance. Atoutes ces raisons ie pourrois adiouster vn grand nombre d'exemples tirez de nostre histoire , & prouuer aux plus incrédules & aux plus interessez du Clergé par de malheureuses expériences la iustice de cette exclusion. Mais ie ne pretens pas vous presser de si prés, ni vous accabler d'un sujet qui vous est si odieux , & contre lequel vous lanceriez volôtiers tous les foudres de vos anathemes. Je vous prie seulement de souffrir que ie vous represente que Iean de Dormans sous le Roy Iean II. fut contraint de renoncer à l'Office de Chancelier de France, apres avoir esté promu à la dignité de Cardinal, ces deux qualitez & emplois ayant esté iugez incompatibles, & qu'il estoit tres mal-aisé de pouoir servir à deux maistres.

Iean de la Grange, appellé le Cardinal d'Amiens, ayant esté toleré avec plus de patience qu'il n'estoit expédient pour le bien public dans la conduite des affaires de ce Royaume , s'enfuit vn jour secrettement sur le rapport de quelques menaces qu'auoit fait le Roy Charles VI contre lui: mais il emporta en Auignon lieu de sa retraite, des richesses si immenses, desquelles il abusa depuis à la rüine de ceux aux despens desquels il les auoit amassées, que le peuple s'en trouua extremement appauury & l'Estat entièrement espuisé.

Le tesmoignage que rend Gaguin de ce Cardinal ne doit pas estre oublié , & quoy que nos miseres l'aye rendu tres commun , & que depuis trente ans que la France est au pillage de deux Cardinaux il ait esté cité en diuerses rencontres , neantmoins il est si auantageux pour faire voir que l'administration des Cardinaux, & généralement de tous les Ecclesiastiques, est funeste à la Fran-

tatis supra modum studiosi. Thuanus histor. lib. 21. ann. 1558. pag. 628. littera c.

Registres du Parlement.

Iuuenal des Vres en l'Histoire de Charles VI.

Gaguin. in vita Caroli 6.

Erat Cardinalis quidam Romanus, Ambianensis appellatus, qui autor fuerat augendi census & tributi, & seuerè ali-

quando Carolus, & a tant de-râpport aux deportemens de vostre lum, dum adhuc cher Mazarin, que i'ay creu que vous seriez bien ayse viueret Pater, d'en voir le tableau dans les propres termes del'autheur tractauerat; quâ que vous pouuez lire en cette marge: & ce qu'en dit ce rem tunc recordatus Carolus bon & sçauant Religieux, Chef d'un Ordre tres célèbre ad Sauosium qui en France, est dautant plus considerable, qu'il part de prope ad stabat, la bouche d'un Ecclesiastique, qui faisoit profession de ecce iam, inquit, saincteté dans ses mœurs, & de dire la verité dans ses paroles. Sauosi, de hoc sacerdoti liberi

erimus. Quo verbo territus Ambianensis confestim per Duacum Auenionem se recepit, exportato ingenti thesauro, quem sibi ex publico contraxerat. Illud si quidem nonnunquam compertum est inter Francos plus damni in rem publicam inuehi dum sacerdotis consilio res agitur, quam cum prudens aliquis ex sæculi nobilitate rebus gerendis præficatur: ille enim nescio qua insatiabili ambitione omnia sibi vendicat: hic populi misertus, & communitatis detrimentum suum esse ratus, reipublicæ benè, vt potest, consulit: Ille fastum & pompam ex dignitate metiens, eò audaciùs diuitias congerit, quo minus vltionem timet Ecclesiastica libertate protectus: hic autem opes suas cum republica coniunctas esse non ignarus, ex publico incommodo priuatum quoque auguratur: nam qui res suas ex reipublicæ statu considerat, illas sine hac nequaquam stare posse intelligit.

*Comines en ses
Mem. Chronique
scandaleuse. Mar-
s'lieu en l'histoire
de Loüis XI.*

Iean Balüe né de bas lieu, fils d'un tailleur d'habits à Poitiers, ayant esté fait Secrétaire d'Estat, Euesque d'Eureux & d'Angers par le support & la faueur de Charles de Melun & de Iean de Beauuau ses bien-faiteurs, les persécuta depuis avec vne crüelle ingratitude, & s'estant insinüé dans les bonnes graces du Roy Loüis XI. Prince dissimulé, seuer & vindicatif, le Pape Paul II. à sa poursuite & recommandation l'honora du Chapeau de Cardinal, en recompense duquel il entre tint diverses intelligences au préiudice de sa Majesté avec les Ducs de Guienne son frère, de Bourgongne & de Bretagne, & commit de si noires perfidies & trahisons contre son Estat, qu'elle fût obligée de le faire mettre en prison avec l'Euesque de Verdun son complice, où il demeura l'espace de onze ans, & selon aucuns historiens, dans vne cage de fer, ouvrage de son inuention, & n'en fut déliuré qu'à l'instance sollicitation du Cardinal de S. Pierre aux Liens, enuoyé Légat en France

France par le Pape Sixte IV. son oncle. Cet adroit & malicieux personnage ayant reconnu que Iean Geofroy Evesque d'Arras auoit esté recompensé du Chapeaurouge, pour auoir travaillé à l'abolition de la Pragmatique Sanction, tant desirée de la Cour de Rome, & si préjudiciable à l'Eglise Gallicane, ne cessa depuis d'en importuner le Roy, & fit tant par ses menées qu'il lui en extorqua les Lettres & les apporta lui mesme au Parlemēt pour les y faire vérifier. Le Procureur général Saint Romain s'y estant vigoureusement opposé, & ayāt mesprisé les injures & les menaces que Balüe lui fit à cette occasion au nom & de la part du Roy, empescha pour lors l'effet qu'il s'estoit promis de ce desseruice signalé réduit à l'Eglise & à l'Estat. Neantmoins ayāt esté suivi de quantité d'autres de sa part pour la grandeur & le profit de la Cour de Rome, il lui procura suiuant son attente la dignité de Cardinal, quoy qu'avec peine & difficulté, le Pape n'y ayant condescendu, nonobstant les mauuais offices rendus par ce Prélat en sa faueur à son Prince & à son país, que pour contenter la violente passion que le Roy lui tesmoigna en auoir. Si nous examinons l'administration de Guillaume Briçonnet, qui fut crée Cardinal à Rome par le Pape Alexandre VI. en la présence & à la recommandation du Roy Charles VIII. son Maistre, duquel il dispoisoit absolument, nous trouverons que ce fut pour auoir sauué ce Pape d'un Concile que l'Eglise vniuerselle demandoit à Sa Majesté, pour deposseder de la Chaire de Saint Pierre le plus impie, le plus sale & le plus cruel homme, qui ait iamais profané ses Mysteres, souillé sa pureté & deshonorer sa réputation. Plusieurs Historiens se sont estudiez à nous persuader que le Ministère de Georges d'Amboise a esté exempt de tous ces reproches, & qu'ayant gouverné doucement & paisiblement la France sous l'autorité du Roy Louïs XII. patron incomparable de iustice & de bonté à ses successeurs, il s'estoit comporté avec toute la prudence & la fidelité requise en vn employ si illustre & si important, il est pourtant

Chroniq. scandal.
Budé in forētib.

*Guichardin &
Comines.*

*Guichardin, Bel-
leforest & autres
Historiens moder-
nes.*

certain (si nous adioustons foy aux Auteurs les mieux informez & les moins suspects) qu'au commencement de sa faueur pour obtenir le chapeau de Cardinal, & y ioindre la Legation du S. Siege en ce Royaume, qui sont l'amorce & le prix des infidelitez & des desservices, que font les Ecclesiastiques en faueur des Papes, aux Princes & aux Estats desquels ils sont nez suiets, il conseilla au Roy contre ses interests & les vœux de toute la Chrestienté de se liguier avec Cesar Borgia fils naturel du Pape Alexandre V I. si bien que lui ayant fourni suivant cet avis les troupes nécessaires pour conquérir la Romagne, il abandonna misérablement à l'avarice, à la luxure & à l'inhumanité de ces deux monstres, également détestables envers Dieu & envers les hommes, la fortune, l'honneur & la vie des plus nobles, des plus riches & des plus puissans Seigneurs d'Italie. Ce procédé ayant excité vne haine générale cōtre ces abominables tirans, & vn blasme vniuersel contre leurs protecteurs, le Roy touché de compassion & ialoux de sa renommée, résolut d'arrester le cours de leurs sanglantes vsurpations: Mais le Cardinal d'Amboise, son principal confident, s'estant contenté de leur monstrier la verge sās les en frapper, & par cette crainte ayāt arraché d'eux la continuation durant 18 mois de sa Legation en Frâce, & promesse de la promotion de ses parens & de ses creatures au Cardinalat, affectant d'ailleurs le bruit d'estre amateur & conseruateur du Domaine Ecclesiastique, pour se frayer par ces moyens le chemin à la dignité de Souuerain Pontife de l'Eglise Romaine, il appaisa la colere du Roy, & remit en ses bonnes graces le Pape & le Duc de Valentinois, qui poursuuiurent sous son auen leurs injustes conquestes avec plus de meschanceté & de violence qu'ils n'auoyent fait auparauant. Le Pape estant mort de poison, & l'armée Françoisie destinée pour le recourement du Royaume de Naples se trouuant alors sur les tetres de l'Eglise de Rome, le Cardinal l'y fit séjourner long-temps afin d'autoriser & d'animer par les armes les brigues de ses partisans dans

le Conclauë ; mais aiant esté trompé par le Cardinal Sforze, & veu passer en peu de iours deuant ses yeux l'eflection de deux Papes, sans auoir pû paruenir à ce rang, il la fit acheminer vers les frontieres de Naples, apres auoir donné loisir aux Espagnols de se préparer, comme ils firent, à vne forte defensue, & iuiné par ces longueurs le succès d'une si iuste & si glorieuse entreprise. Quelques legers mescontentemens qu'il eut des Vénitiens, lui firent traiter & conclure à Cambray, contre leur République, avec le Pape Iules II. l'Empereur Maximilian I. Ferdinand Roy d'Espagne & quelques Princes d'Italie, la plus imprudente & la plus pernicieuse ligue, de laquelle fassent mention nos Histoires. Car le Roy aiant combattu & defeat seul les Vénitiens à la bataille d'Agnadel & supporté tous les frais de cette guerre, ses prétendus Confederez, & par effet ennemis jurez de la Monarchie Françoisë, qui s'estoient tenus cependant les bras croisez, accoururent de diuers endroits pour recueillir les fruits de ses fatigues & partager le bon-heur de sa victoire, de laquelle aiant conceu de furieuses desiances & ialousies, le Pape violant le premier vn Traité qui lui auoit esté si avantageux receut en grace les Vénitiens, les reconcilia avec l'Empereur & le Roy d'Espagne, & passant tous ensemble d'une extremité à l'autre, vnirent toutes leurs forces contre le Roy, qui aiant emporté d'abord d'insignes avantages sur eux, vit toutesfois à la fin ses armées defaites, ses Estats attaquez & interdits, lui, ses Alliez, & ses suiets excommuniiez & pros crits, & la Duché de Milan & autres Seigneuries de là les Monts enuahies & perduës, desquelles depuis tant d'années il se trouuoit paisible possesseur. En ce point seul le Cardinal fut heureux de n'auoir pas suruésou à la decadence des affaires de ceste Monarchie, & de n'auoir pas eu le regret d'estre spectateur des dommages & des miseres que lui causa l'exécution fatale de ses funestes conseils. Le Roy Louis XII. mort, François I. estant parvenu à la Couronne, prépara incontinent vne puissante armée pour reconquerir la

*De Thou.
Guichardin.*

Duché de Milan, qui avoit esté vſurpée ſur ſon predeceſſeur : il força heureuſement le paſſage des Alpes, vainquit les Suiffes à Marignan, qui s'eſtoient iuſques là eſtimez invincibles, & triompha pour lors avec honneur & avec avantage des plus fiers & plus dangereux ennemis de la France. Le Pape Leon X. qui le croioit juſtement irrité des traverſes cachées & des obſtacles ſecrets qu'il avoit apportés à ſes entrepriſes, ne manqua pas d'avoir recours aux artifices & aux corruptions de ſes predeceſſeurs, aiant gagné aupres du Roy, Aitius Gouffier ſieur de Boiſy, grand Maïſtre de France, ſon plus confident ſavory, Antoine du Prat, auparavant premier Preſident au Parlement de Paris, dont il ſe rendit apres le perſecuteur, & pour lors Chancelier de France, & ſon principal Miniſtre, & ce moiennant deux Chapeaux de Cardinal, dont l'vn fut donné à Adrien Gouffier frere du grand Maïſtre, & l'autre à Antoine Bohyer neveu du Chancelier, lequel ne pouvant aspirer au Cardinalat tant qu'il ſeroit marié, le prit pour ſon parent, attendant qu'il put le prendre pour lui meſme. Jamais Rome ne vendit ſes denrées plus cherement à la France. Car le Roy ſeduit par la ſuggeſtion de ces deux Miniſtres, ſentit à l'abolition de la Pragmatique Sanction, & paſſa vn Concordat avec le Pape touchant la prouiſion des Benefices & reglement des matieres Eccleſiaſtiques, par lequel les Eſlections furent ſupprimées, le droit de nomination du Roy & collation du Pape eſtably, & l'ancienne police de l'Egliſe entièrement abolie. Ce deſordre general introduit dans le Sanctuaire par l'avarice & l'ambition de quelques particuliers, a produit (ſi l'on en croit les graues Hiſtoriens & les bons Prelats de ce ſiecle là) l'aneantiſſement de la vraye diſcipline Eccleſiaſtique, & a cauſé la ruïne & les diſgraces extraordinaires, qui atriuerent en ſuite à la perſonne du Roy & à l'Eſtat. Auſſi le Parlement ne le veriſia que fort tard & par force, aiant eſté contraint apres pluſieurs remiſes de ceder aux commandemens ſeuers & aux traitemens rigoureux, deſquels le Roy les

*Regiſtres du Par-
lement ſous Fran-
çois I.*

auoit

auoit souuent menacez à l'instigation du Chancelier du Prat. Durant la detention du Roy en Espagne les aigreur s'estant renouuellées entre le Parlement & lui, à raison de quantité de bons & de grands benefices, ausquels estant deuenu veuf il se faisoit nommer par la Regente lui & ses creatures, & des eslections qui s'en faisoient par les Chapitres, sans auoir esgard au Concordat, d'autres personnes que les nommez par elle, lesquelles estoient favorisées par le Parlement, il eschauffa tellement l'humeur du Roy cōtre cet Illustre Corps, apres qu'il eut recouré sa liberté, qu'il s'emporta à des excez & à des paroles piquantes iusques au vis, qui ont esté conseruées dans les Registres, & qu'il vaut mieux taire par respect que rapporter par curiosité. Enfin se trouuant reuestu des plus belles Prelatures & enrichy des meilleurs reuenus Ecclesiastiques de ce Royaume, le Pape Clement VII. quelque temps apres l'associa au College des Cardinaux, & lui conféra la dignité de Legat perpetuel en France, laquelle il exerça comme ses autres Charges avec beaucoup d'auarice, ce qui parut clairement vn peu deuant sa mort. Car ayant de longue main projecté de s'esleuer au souuerain Pontificat, & dans ce dessein appuyé les interests de la Cour de Rome, au detrimēt & au deshonneur de son Roy & de sa patrie, & amassé iusques à 400000 escus (somme exorbitante en ce siecle là) pour corrompre les suffrages des Cardinaux, le S. Siège estant venu à vaquer par le decez de Clement VII. il declara aussitost au Roy son intention, qui se moquant en soy-mesme de la vanité d'vne pretention si ambitieuse, où iugeant à bon escient qu'elle ne pouuoit reüssir sans vne profusion excessive enuers ceux qui composoient le Conclauē, luy refusa d'y entendre pour cette dernière raison, laquelle le Cardinal ayant preueue il luy repartit avec imprudence, qui luy cousta bien cher apres, que s'il plaisoit à sa Majesté de s'engager plus auant en cette affaire qu'il trouueroit pour l'aider iusques à 400000. escus. Le Roy surpris de cette offre enuoya pendant la maladie,

Laurent Cappelloni en ses diuers discours liure 3.

de laquelle il deceda , se saisir de son tresor pour s'en ser-
uir au payement de sa rançon & de celle de ses enfans;
dequoy luy ayant fait plainte par vn mot de lettre, &
l'ayant supplié de ne luy prendre point son bien à tout
le moins de son viuant, il en receut cette responce nota-
ble, & qui doit porter de la terreur dans l'ame des Minis-
tres, qui osent persuader aux Princes de raur sans justi-
ce les biens de leurs sujets, qu'il lui faisoit le mesme trai-
tement qu'il lui auoit autrefois conseillé de faire à au-
truy. Cette perte lui causa vn si sensible deplaisir, & son
mal s'en augmenta tellement, qu'il en mourut quelque-
temps apres hay & detesté de tout le monde.* Sous le
regne du Roy Henry II. Charles Cardinal de Lor-
raine, grand de naissance & d'entendement, mais vio-
lent & ambitieux outre mesure, ayant traité secrette-
ment à Rome entre le Pape Paul IV. & les Caraffes
ses neveux, ennemis passionnez de l'Espagnol, & le Roy
de France, vne ligue contre l'Empereur Charles V. &
Philippes II. Roy d'Espagne son fils, & fait violer au
Roy son Maistre pour cette occasion la treue accordée
entr'eux l'an 1556. contre la foy si solennellement don-
née & l'avis des principaux de son Conseil, qui estoient
le Connestable de Montmorency & le Cardinal de
Tournon, il jetta la France espuisée d'hommes & d'ar-
gent par l'enuoy d'vne grâde armée en Italie au secours
des Caraffes sous le commandemēt du Duc de Guise, &
presque atterrée par le funeste euenement de la bataille

*D' Auila,
Monsieur de Thou
& les autres der-
niers Historiens.*

Proinde nemi-
nem mirari de-
bere, si Cathari-
næ, si denique
Guilianorum
potentia omni-
bus bonis adeo
intoleranda vi-
deatur: ac præci-
pue Caroli Car-
dinalis: quippe
cum legibus pru-
denter à maiori-
bus perspectum
sit, ne sacris ad-
dicti, & Pontifi-
ci obnoxij sum-
mam rerum in
Gallia teneant:

ea de causa olim Ioanni Dormanio Bellouacorum Episcopo ac Franciæ Cancellario
adempta sigilla à Ioanne, quod in Cardinalium numerū coopratu duobus dominis
feruire non posset: ob eandē causam Ioannem Baluam, & Thomā Volsæum Cardina-
les à Ludouico XI. & Henrico VIII. Anglorum rege male multatos esse, quod per
eos magnas calamitates regnis vtriusq; importatas constaret. Venetum senatum,
qui merito omnis ciuilis prudentiæ officina vocari debeat, id diligenter cauere;
apud quem sacris initiati nullam reipublicæ partem attingunt: memori vero patrum
nostrum peruulgatum quid Cardinalis Ambianensis Ioannes à Grangia Carolo VI.
Rege molitus sit, qui maiore patientia quàm decuit toleratus, postremo Francia
excedere coactus est, ablatisque ingentibus thesauris, potentia in regno parta non
minus absens perniciosè vltus est, quam præsens fecerat &c.

Thuan. histor. lib. 23. ann. 1559. pag. 695. Litter. B.

de S. Quentin, en de perilleuses extremitez ; desquelles s'estant retirée plustost par bon-heur & par miracle que par puissance ou par sagesse, & ayant repris aucunement les forces, toutefois elle fut obligée pour éviter vne recherche qui lui eust esté mortelle, de consentir à la Paix qui fut concludë & arrestée au mois d'Auril de l'an 1539. au Cateau-Cambresis, avec vne perte & vne honte si insigne & si notoire, que les bons François ne scauroient se defendre d'en murmurer & d'en rougir. Apres le decez de Henry, le Cardinal de Lorraine & le Duc de Guyse s'estant emparez de la personne du Roy François II. & du Gouvernement de son Estat, exercerent sous pretexte de Religion de grandes violences contre les Princes du Sang, & particulièrement contre Louys Prince de Condé, qui eust perdu la teste par Commissaires, si la mort inopinée de ce ieune Roy ne l'eust deliuré de leur injuste condamnation. A l'entrée du regne de Charles IX. ces Lorrains furent esloignez du cabinet pour oster les ombrages qu'ils faisoient aux Princes du sang r'entrez dans le credit & le maniment des affaires publiques. Le Cardinal pour adoucir son ennuy s'achemina à Trente, où se tenoit ce fameux Concile, auquel ayant d'abord fait paroistre vn zele ardent pour la reformation de l'Eglise, & imprimé de vives apprehensions dans les esprits du Pape & des Cardinaux de ses intrigues & de ses menées, il s'accorda enfin avec-eux & seruit à l'accomplissement de leur dessein, qui estoit de faire auorter les projets & les propositions qu'on auoit auancées & negociées dans le Concile, quitendoient au retablissement de l'ancienne discipline de l'Eglise, à la diminution de l'autorité que les Papes y ont vsurpée depuis six ou sept cens ans, à la correction des mœurs, à l'abbaissement de l'orgueil & à la moderation du luxe de la Cour de Rome. A son retour de Trente il suiuit sa premiere pointe, & precipita tous les partis dans vne si furieuse aigreur pour complaire au Pape & à ses Ministres, qu'ils deuiendrent irreconciliables, & mirent l'Estat par leur frequentes & espou-

*Monsieur de Thou
& autres Histo-
riens du temps.*

uentables saignées en d'estranges conuulsions. Je ne
veux pas examiner icy ny les interets ny les actions du
Cardinal de Guyse, qui fut tué à Blois en l'an 1588. ny de
celui de Bourbon, qui mourut prisonnier à Fontenay le
Comte sous Henry IV. en l'an 1590. ny de celui de
Pelleuë, qui expira de regret de voir Paris reduit à
l'obeyssance du mesme Roy, ny de celuy du Per-
ron, qui s'efforça de persuader aux Estats Generaux
tenus à Paris en 1615. que la Couronne du Roy, mesme
au temporel, estoit subalterne de la Tiare du Pape, ny
de plusieurs autres que ie passe sous silence, à cause qu'ils
n'ont pas esté admis au secret des Conseils, ny à la con-
duite absoluë des affaires. Je ne pretens pas non plus
exaggerer le gouuernement auare, cruel & tyrannique
du Cardinal de Richelieu, qui non content d'auoir joué
si long-temps le feu Roy, traité indignement la Reyne
sa femme, emprisonné & poursuiuy iusques à la mort la
Reine sa Mere, assassiné les Princes de son sang, exter-
miné par l'exil, le fer, & le poison les grands Seigneurs,
opprimé les Parlemens, persecuté les Magistrats; cor-
rompu nos mœurs, violé nos loix, liuré nos biens & nos
vies à la corruption des Commissaires & au brigandage
des Partisans, qui sont les bourreaux & les sanglues des
Estats, & poussé l'excez de ses violences suiuant le train
de ses conquestes, semble n'auoir voulu laisser apres sa
mort la principale direction & le secret des affaires de
ce Royaume au Cardinal Mazarin, aussi meschant &
aussi interessé que lui, que pour maintenir la fortune &
la splendeur de sa maison, toute bastie & cimentée des
larmes & du sang des peuples, & se faire regretter par la
comparaison d'un si infame, si ignorant, si traistre, si in-
digne & si barbare successeur. Je me doute bien, Mon-
seigneur, que vous estes homme à vous offenser de ces
Eloges d'honneur, que iay distribuez assez liberalement
à ce dernier Cardinal, duquel vous avez esté esclau &
adulateur, & que possible vous aurez senti de l'ennuy au
recit de tant de raisons, d'autoritez & d'exemples: at-
tribuez en la faute à vostre pretenduë assemblée du
Clergé

Clergé de France, qui n'a pas eu bonne grace de s'opposer à vne loy, qui est fondée sur la parole de Dieu, puisée dans les eaux sacrées du S. Esprit, & renouvelée depuis tant de siècles de Conciles en Conciles. Et vous, Monseigneur, vous me pardonnerez si ie vous dis, qu'en signant cet acte d'opposition, vous avez signé vne renonciation publique à la résidence, & qu'après cela vostre Clergé perd l'esperance de vous voir iamais dans vostre Archeuesché. Vous excuserez la liberté qu'à prise vn petit Clerc de vostre Diocese de vous escrire ses sentimens sur vne si haute matiere; mais l'abandonnement de vostre Eglise, qui ne vous a encor iamais veu, & ne vous connoist que par la Gazette, qui nous apporte par tous les Couriers de vos nouvelles, pour nous confirmer que vous estes tousjours dans l'esprit de non résidence, scandalise tellement toute la Province, que i'ay creu vous rendre vn grand seruice de vous aduertir de ce qui s'en disoit. Vostre Palais Archiepiscopal, qui est vne des plus belles maisons d'Archeuesque de France, sert maintenât d'habitation aux chouettes & aux hiboux, & ces oyseaux de solitude nous font pronostiquer que vostre Eglise sera long temps veufue, & que vostre intention n'est pas de remplir si-tost vostre Siege. On dit que la Regale ne souffre point de fiction, & qu'il faut vne possession réelle, actuelle & personnelle, pour en oster l'ouuerture: ie m'estonne que les Officiers du Roy n'ont point encor saisi vos fruits: car il n'y a eu jusques à present aucune realité en vostre fait, & toutes vos actions n'ont esté que fictions. Il y a à craindre que vostre non résidence & le decret d'adiournement personnel, que vous aviez merité, pour auoir signé l'acte d'opposition, également injurieux & à vostre Ordre & au Parlemēt, ne donne lieu à vne saisie de vostre temporel, & que l'on ne renouvelle à vostre esgard la Declaration de 1561, & puis après ce sera à vous à recourir aux submissions & aux abaissemens qui ne vous seront pas insupportables: Car vous y estes nourry de longue main & vous vous y estes beaucoup exercé envers le Cardinal Mazarin vostre bon

Patron, vous ne devez pas pourtant négliger cet avis de Palais que ie vous donne en passant, & si vous n'y pourvoyez de bonne heure il y a du peril pour le temporel. C'est à vous à y penser & à preuenir tous les inconueniens qui en peuuent arriver. Si iamais, Monseigneur, la resolution de resider vour prend, vous apporterez vn grand esclarcissement à la dispute du temps, qui brouilletant desprits sur le point de la grace & comment elle opere: Car par vos deportemens du passé on pourra conclure que ce sera vne pure grace de Dieu, sans qu'il y ait eu aucune coopération de vostre part, & comme vous fermez les yeux & bouchez les oreilles à toutes les voyes humaines qui pourroyent contribuer à vostre salut, il faut attendre ce grand coup du Ciel. Et pour ce là vostre Clergé a ordonné des prieres publiques, afin qu'il plaise à Dieu trauailler puissamment à vostre conuersion, laquelle ne sera iamais si prompte & si véritable que la souhaite

Monsieur,

Vostre tres humble & tres obéissant
seruiteur en Iesus Christ, Thimhée
Clerc du Diocèze d'Ambrun.

A Ambrun ce 1.
de May 1651.

ACTE D'OPPOSITION *du Clergé, du 16. Mars 1651.*

A La requeste des Archeuesques, Euesques & autres Ecclesiastiques Deputez en l'Assemblée generale du Clergé de France, tenuë par permission du Roy en cette ville de Paris, representant le Clergé general, & l'Estat Ecclesiastique de ce Royaume, soit signifié à Monsieur le Garde des Seaux de France, en par

lant à la personne du sieur de Combes Conseiller du Roy en ses Conseils, & grand Audiancier de France, qu'ils s'opposent au Seau des Lettres & Declaration, qu'ils apprennent estre presentement poursuiuies par Messieurs du Parlement de Paris, pour exclure des Conseils du Roy Messieurs les Cardinaux François, comme telle Declaration estant vne nouueauté, qui va directement à renuerfer les trois Ordres du Royaume par l'affoiblissement de celuy qui de tout temps y tient le premier rang, & qui est entierement contraire à l'honneur de l'Eglise, au seruice du Roy & au bien de l'Estat, de laquelle opposition ils ont requis acte pour se pouruoir en son temps, au cas qu'il soit passé outre au prejudice d'icelle, & ont esleu leur domicile en la personne des sieurs Agens du Clergé. Signé George d'Aubusson, Archeuesque d'Ambrun, President: Et plus bas, Par Nosseigneurs de l'Assemblée. M. T V B O E V F.

Par les officiers de l'Assemblée. M. TROUVÉ.
L'Assemblée a vu avec plaisir que les
dépenses de l'Assemblée, pour l'année
1789, ont été réduites de moitié, et
qu'elle a été en mesure de payer
les dépenses de l'Assemblée, pour
l'année 1789, par les contributions
de l'Assemblée, pour l'année 1789.
L'Assemblée a vu avec plaisir que
les dépenses de l'Assemblée, pour
l'année 1789, ont été réduites de
moitié, et qu'elle a été en mesure
de payer les dépenses de l'Assemblée,
pour l'année 1789, par les contribu-
tions de l'Assemblée, pour l'année
1789.